

Garde ou dignité

Ene kitchose ki boucou parmi nou na pas conné ou bien na pas oulé comprend ki la vrai dignité c'est la dignité ki Allah Ta'ala donné. Quand Allah Ta'ala dénigré kiken, perna personne ki capave donne li valeur.

Ene l'autre kitchose ki boucou parmi nou capave pas conné ki nou dignité trouve dans garde dignité et l'honneur nou prochain. Si nou pense pou prend l'honneur nou camarade c'est couma dire nou pé coupe sa branche ki nou pé assizé lor la. C'est ene façon pou alle dénigrer nou même plutard.

Rassouloullah (s.a.w) fine dire :-"Celui ki reste dans rode défaut so camarade, Allah Ta'ala aussi reste dans rode so défaut. Celui ki Allah Ta'ala rode so défaut, (perna li sappé) parceki Allah Ta'ala pou dénigrer li-même si li reste fermé dans l'intérieur so la caze."

(Tirmizi et Ibn Hibban)

Acoze sa même dire pas avoye roche lor la caze ou camarade quand ou la caze en vitre. Bizin mette dans la tête ki dignité nou camarade c'est nou dignité. (Extrait de *Al-JAMIAT*, Vol.1 No.1)

Nourriture Halaal

Halaal li bien clair et haraam (aussi) li bien clair. Et entre ça deux-là ena boucou kitchoses ambiguës ki boucou dimoune pas conne zotte (position légale). Celui ki évite banne kitchoses ambiguës, veut dire ki li fine protège so Deen et so l'honneur et celui ki tombe dans banne kitchoses ki ena doute, li couma dire ene berger ki faire (ene troupeau zanimau) brouter autour de ene réserve en sorte ki ena tout possibilité li capave tombe là-dans. Tout le roi ena ene réserve. Certainement Allah Ta'ala so réserve lors so la terre, c'est banne kitchoses ki li fine interdit. Certainement ena ene morceau la chaire dans le corps quand li dressé, entier le corps dressé et quand li corrompu, entier le corps corrompu. Attention ça morceau la chair-là c'est le cœur." (Boukhari)

Règlement concernant banne kitchose douteux

Dans ene situation cote ene dimoune tombe dans ene dilemme pareil, Nabi Sallallaahu 'alayhi Wassallam conseille li pou reste loin et pas alle de l'avant. Selon Nabi Sallallaahu 'alayhi Wassallam, c'est ene moyen pou ene dimoune préserve so Deen et so l'honneur. Pou explique ça, Nabi Sallallaahu 'alayhi Wassallam fine donne nou ene l'exemple cote li fine compare banne kitchose haraam avec ene réserve. Couma ene dimoune ki amène so troupeau pou broute l'herbe près avec ene réserve ena toute chance ki so troupeau rente dans réserve, coumsa même ene dimoune ki faire négligence concernant banne kitchose douteux, li prend ene grand risque tombe dans haraam.



JAMIAT-UL-ULAMA de MAURICE

Cnr. Penang & Sumatra Street, Port Louis, Mauritius, Tel: 240-0439

<http://www.jamiat-ul-ulama.org>, Email: jamiat@intnet.mu / jamiathalal@myt.mu

